

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ২০/২০১৭-১৮

ঢাকা, বৃহস্পতিবার ২৭ জুলাই ২০১৭, ১২ শ্রাবণ ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। নির্বাচন কমিশন সম্পূর্ণ স্বাধীন ও স্বতন্ত্র : প্রধানমন্ত্রী
- ২। জনগণের প্রকৃত সেবক হিসেবে কাজ করুন : জেলা প্রশাসকদের প্রতি রাষ্ট্রপতি
- ৩। পণ্যের দাম স্বাভাবিক রাখতে ডিসিদের প্রতি নির্দেশ বাণিজ্যমন্ত্রীর
- ৪। রূপকল্প বাস্তবায়নে বড় বাধা মাদক : স্বরাষ্ট্রমন্ত্রী
- ৫। কর্মসংস্থান ও প্রবৃদ্ধিমুখী নতুন মুদ্রানীতি ঘোষণা
- ৬। সরকার তিনটি চ্যালেঞ্জ নিয়ে কাজ করছে : তথ্যমন্ত্রী
- ৭। জনপ্রতিনিধিদের সঙ্গে মিলে ডিসিদের কাজ করতে হবে : রেলপথমন্ত্রী
- ৮। চাইলে দেশের তরুণ সমাজ অনেক কিছু করতে পারে : সজীব ওয়াজেদ জয়
- ৯। ইন্টারন্যাশনাল চ্যাম্পিয়ন অ্যাওয়ার্ড পেলেন সায়মা ওয়াজেদ
- ১০। শিল্পকলায় গুরু হলো ২২তম জাতীয় চারুকলা প্রদর্শনী

১। নির্বাচন কমিশন সম্পূর্ণ স্বাধীন ও স্বতন্ত্র : প্রধানমন্ত্রী

নির্বাচন কমিশন একটি স্বাধীন ও স্বতন্ত্র প্রতিষ্ঠান এবং এটি সম্পূর্ণ স্বাধীনভাবেই কাজ করছে বলে মন্তব্য করেছেন প্রধানমন্ত্রী শেখ হাসিনা। তিনি বলেছেন, সিদ্ধান্ত গ্রহণের সর্বক্ষেত্রে নির্বাচন কমিশন সম্পূর্ণ স্বাধীনভাবেই কাজ করছে। ফ্রান্সের রাষ্ট্রদূত সোফি অবার গতকাল ২৬ জুলাই বুধবার প্রধানমন্ত্রীর সঙ্গে তাঁর তেজগাঁওয়ের কার্যালয়ে সৌজন্য সাক্ষাৎ করতে গেলে প্রধানমন্ত্রী শেখ হাসিনা এ কথা বলেন। বৈঠকে ফরাসি রাষ্ট্রদূত নির্বাচন কমিশনের স্মার্ট কার্ড প্রকল্পের প্রশংসা করে বলেন, এ প্রকল্প ফরাসি প্রতিষ্ঠান ওবের্থার টেকনোলজিসের (ওটি) সহযোগিতায় বাস্তবায়িত হচ্ছে। এটি যথাযথভাবে সম্পন্ন করার জন্য সোফি প্রধানমন্ত্রীর সহযোগিতা কামনা করেন। সূত্র-প্রথম আলো (পৃ.২,ক.৫), সমকাল (শেষ পৃ.,ক.৫), ডেইলি সান (পৃ.৩,ক.১), ইন্ডিপেনডেন্ট (পৃ.১,ক.৭)।

২। জনগণের প্রকৃত সেবক হিসেবে কাজ করুন : জেলা প্রশাসকদের প্রতি রাষ্ট্রপতি

বিশেষ আমলাতান্ত্রিক মনোভাব পরিত্যাগ করে জনগণের প্রকৃত সেবক হিসেবে দেশ এবং দেশের জনগণের সেবা করার জন্য বিভাগীয় কমিশনার ও জেলা প্রশাসকদের (ডিসি) প্রতি আহ্বান জানিয়েছেন রাষ্ট্রপতি মো. আবদুল হামিদ। বঙ্গবন্ধুর দরবার হলে গতকাল ২৬ জুলাই বুধবার বিভাগ ও জেলার প্রশাসনিক প্রধানদের রাষ্ট্রপতি বলেন, বর্তমান যুগে প্রশাসনকে হতে হবে গণমুখী ও উন্নয়নভিত্তিক এবং অতঃপর আমলাদের সেকেলে ধরনের আমলাতান্ত্রিক মনোভাব ত্যাগ করা প্রয়োজন। রাষ্ট্রপতি বলেন, তৃণমূল পর্যায়ের বিভিন্ন সরকারি কার্যক্রমের প্রধান সমন্বয়ক হিসেবে দেশকে জাতির পিতা বঙ্গবন্ধু শেখ মুজিবুর রহমানের স্বপ্নের ক্ষুধা, দারিদ্র্য ও শোষণমুক্ত দেশ হিসেবে গড়ে তোলার জন্য আপনাদের মেধা ও দক্ষতাকে কাজে লাগাতে হবে। তিনি বিভাগীয় কমিশনার ও ডিসিদের প্রতি ভীতি, লোভ ও অনুরাগ অথবা বিরাগের উর্ধ্বে উঠে দায়িত্ব পালনেরও আহ্বান জানান। সূত্র-প্রথম আলো (পৃ.২,ক.২), জনকণ্ঠ (পৃ.১,ক.৮), বাংলাদেশ টুডে (শেষ পৃ.,ক.২), নিউ এজ (পৃ.১,ক.২)।

৩। পণ্যের দাম স্বাভাবিক রাখতে ডিসিদের প্রতি নির্দেশ বাণিজ্যমন্ত্রীর

স্থানীয়ভাবে নিত্যপ্রয়োজনীয় পণ্যের দাম স্বাভাবিক রাখতে জেলা প্রশাসকদের (ডিসি) ব্যবস্থা গ্রহণের নির্দেশনা দিয়েছেন বাণিজ্যমন্ত্রী তোফায়েল আহমেদ। গতকাল ২৬ জুলাই বুধবার সচিবালয়ের মন্ত্রিপরিষদ সভাকক্ষে ডিসি সম্মেলনের দ্বিতীয় দিনের অধিবেশন শেষে এ কথা বলেন বাণিজ্যমন্ত্রী। সূত্র-সমকাল (পৃ.৩,ক.৮), সংবাদ (পৃ.১,ক.৬), ডেইলি স্টার বিজনেস পাতা (পৃ.১,ক.৫), এশিয়ান এজ (পৃ.১১,ক.৫)।

৪। রূপকল্প বাস্তবায়নে বড় বাধা মাদক : স্বরাষ্ট্রমন্ত্রী

ভিশন-২০২১ ও রূপকল্প-২০৪১ বাস্তবায়নে বড় বাধা মাদকের আত্মসন বলে উল্লেখ করেছেন স্বরাষ্ট্রমন্ত্রী আসাদুজ্জামান খাঁন কামাল। তিনি বলেন, বঙ্গবন্ধুর স্বপ্নের বাংলাদেশ গড়ে তুলতে দেশের যুব সমাজকে মাদকের হাত থেকে রক্ষা করতে হবে। সমাজের অর্থালিঙ্গু মানুষ যুবকদের ইয়াবার দিকে ঠেলে দিচ্ছে। শুধু বল প্রয়োগ করে মাদক নিয়ন্ত্রণ করা সম্ভব নয়। এ জন্য সমাজের সবাইকে এগিয়ে আসতে হবে। গতকাল ২৬ জুলাই বুধবার রাজধানীর ওসমানী স্মৃতি মিলনায়তনে মাদকদ্রব্যের অপব্যবহার ও অবৈধ পাচারবিরোধী আন্তর্জাতিক দিবস উপলক্ষে আয়োজিত আলোচনা সভা ও পুরস্কার বিতরণ অনুষ্ঠানে তিনি এসব কথা বলেন। সূত্র-সংবাদ (পৃ.১,ক.২), জনকণ্ঠ (পৃ.২,ক.১), নিউ এজ (পৃ.৩,ক.২), ডেইলি স্টার (পৃ.৩,ক.৩)।

৫। কর্মসংস্থান ও প্রবৃদ্ধিমুখী নতুন মুদ্রানীতি ঘোষণা

কর্মসংস্থান ও প্রবৃদ্ধিমুখী নতুন মুদ্রানীতি ঘোষণা করেছে বাংলাদেশ ব্যাংক। চলতি ২০১৭-১৮ অর্থবছরের প্রথমার্ধের (জুলাই-ডিসেম্বর) ঘোষিত মুদ্রানীতিতে বেসরকারি খাতের ঋণের লক্ষ্যমাত্রা কমিয়ে দিয়েছে কেন্দ্রীয় ব্যাংক। গতকাল ২৬ জুলাই বুধবার বাংলাদেশ ব্যাংকের প্রধান কার্যালয়ে এক সংবাদ সম্মেলনে এ মুদ্রানীতি ঘোষণা করেন ব্যাংকের গভর্নর ফজলে কবির। সূত্র-জনকণ্ঠ (পৃ.১,ক.২), ফিনানশিয়াল এক্সপ্রেস (পৃ.১,ক.৬), নিউজ টুডে বিজনেস পাতা (পৃ.১,ক.২)।

৬। সরকার তিনটি চ্যালেঞ্জ নিয়ে কাজ করছে : তথ্যমন্ত্রী

তথ্যমন্ত্রী হাসানুল হক ইনু বলেছেন, সরকার এখন তিনটি চ্যালেঞ্জ নিয়ে কাজ করছে। একটি হলো জঙ্গি দমন করে দেশে শান্তি প্রতিষ্ঠিত করা, দ্বিতীয়টি হচ্ছে বৈষম্য ও দারিদ্র্যমুক্ত উন্নয়নশীল দেশ গড়া, তৃতীয়টি হচ্ছে দলবাজিমুক্ত সুশাসন প্রতিষ্ঠা করা। এ সময় তিনি আরো বলেন, বাংলাদেশে শিল্প প্রতিষ্ঠানের মালিকদের সর্বাঙ্গিক সহযোগিতা করছে বর্তমান সরকার। তাই শিল্প প্রতিষ্ঠান মালিকপক্ষকে শ্রমিকদের সব রকমের সুযোগ-সুবিধা দিতে হবে। গতকাল ২৬ জুলাই বুধবার সাভারের আশুলিয়ায় বড় রাঙ্গামাটিয়া এলাকায় পিকাড কমিউনিটি স্কুল উদ্বোধন অনুষ্ঠানে তিনি এসব কথা বলেন। সূত্র-ইত্তেফাক (শেষ পৃ.,ক.৮), জনকণ্ঠ (পৃ.১,ক.৫)।

৭। জনপ্রতিনিধিদের সঙ্গে মিলে ডিসিদের কাজ করতে হবে : রেলপথমন্ত্রী

রেলপথমন্ত্রী মুজিবুল হক জনপ্রতিনিধিদের সঙ্গে মিলে কাজ করতে জেলা প্রশাসকদের (ডিসি) প্রতি আহ্বান জানিয়েছেন। তিনি বলেন, বর্তমান সরকার জনগণের কল্যাণে সবকিছু করছে। আর জনকল্যাণে মাঠ পর্যায়ের প্রতিনিধি হিসেবে জেলা প্রশাসকদের জনপ্রতিনিধিদের সঙ্গে মিলে কাজ করতে হবে। গতকাল ২৬ জুলাই বুধবার সচিবালয়ের মন্ত্রিপরিষদ কক্ষে জেলা প্রশাসক সম্মেলন-২০১৭ তে রেলপথ মন্ত্রণালয় বিষয়ক আলোচনায় তিনি এসব কথা বলেন। সূত্র-ইত্তেফাক (পৃ.১৩,ক.১)

৮। চাইলে দেশের তরুণসমাজ অনেক কিছু করতে পারে : সজীব ওয়াজেদ জয়

প্রধানমন্ত্রীর আইসিটি বিষয়ক উপদেষ্টা সজীব ওয়াজেদ জয় বলেছেন, বাংলাদেশের তরুণ সমাজ চাইলে অনেক কিছু করতে পারে। আমাদের বিরুদ্ধে ষড়যন্ত্র করে পদ্মা সেতুর অর্থ বরাদ্দ বন্ধ করা হয়েছিল। কিন্তু আমরাই সেটা করেছি। আমরা পারি, আমরাই পারব। গতকাল ২৬ জুলাই বুধবার রাজধানীর একটি প্যাঁচতারা হোটেলে সেন্টার ফর রিসার্চ এন্ড ইনফরমেশন (সিআরআই) আয়োজিত লেটস টক উইথ অনুষ্ঠানে তিনি এ কথা বলেন। সূত্র-জনকণ্ঠ (পৃ.১,ক.৮), ইত্তেফাক (শেষ পৃ.,ক.৫), এশিয়ান এজ (পৃ.১,ক.২)।

৯। ইন্টারন্যাশনাল চ্যাম্পিয়ন অ্যাওয়ার্ড পেলেন সায়মা ওয়াজেদ

বিশ্ব স্বাস্থ্য সংস্থার মানসিক স্বাস্থ্য বিষয়ক অ্যাডভাইজরি প্যানেলের বিশেষজ্ঞ, বাংলাদেশের অটিজম বিষয়ক জাতীয় উপদেষ্টা কমিটির সভাপতি সায়মা ওয়াজেদ হোসেন পুতুল অটিজম আক্রান্ত ব্যক্তিদের কল্যাণে নিরবচ্ছিন্ন ও উদ্ভাবনীমূলক কাজের স্বীকৃতিস্বরূপ 'ইন্টারন্যাশনাল চ্যাম্পিয়ন অ্যাওয়ার্ড'-এ ভূষিত হয়েছেন। মার্কিন যুক্তরাষ্ট্রে আয়োজিত এক অনুষ্ঠানে তাঁকে এই অ্যাওয়ার্ড প্রদান করা হয়। গতকাল ২৬ জুলাই বুধবার নিউইয়র্কে জাতিসংঘে বাংলাদেশ স্থায়ী মিশনের বরাত দিয়ে পররাষ্ট্র মন্ত্রণালয় থেকে পাঠানো এক বিজ্ঞপ্তিতে এ তথ্য জানানো হয়েছে। সূত্র-জনকণ্ঠ (পৃ.১,ক.৬), ইত্তেফাক (শেষ পৃ.,ক.১), ইন্ডিপেনডেন্ট (শেষ পৃ.,ক.১), ডেইলি সান (শেষ পৃ.,ক.১)।

১০। শিল্পকলায় শুরু হলো ২২তম জাতীয় চারুকলা প্রদর্শনী

বাংলাদেশ শিল্পকলা একাডেমির উদ্যোগে প্রতিবছর অনুষ্ঠিত হয়ে আসছে 'জাতীয় চারুকলা প্রদর্শনী'। সেই ধারাবাহিকতায় এবার শিল্পকলা একাডেমির উদ্যোগে এবং একাডেমির চারুকলা বিভাগের ব্যবস্থাপনায় শুরু হলো '২২তম জাতীয় চারুকলা প্রদর্শনী ২০১৭'। এ উপলক্ষে গতকাল ২৬ জুলাই বুধবার শিল্পকলা একাডেমির জাতীয় চিত্রশালা মিলনায়তনে অনুষ্ঠিত হয় উদ্বোধনী ও প্রদর্শনীতে স্থান পাওয়া শিল্পকর্ম থেকে বাছাই করে সেরা

১০ শিল্পীকে পুরস্কার প্রদান অনুষ্ঠান। এ অনুষ্ঠানে প্রদর্শনীর উদ্বোধন ও পুরস্কারপ্রাপ্ত শিল্পীদের মাঝে পুরস্কার প্রদান করেন অনুষ্ঠানের প্রধান অতিথি অর্থমন্ত্রী আবুল মাল আবদুল মুহিত। এ সময় অনুষ্ঠানে বিশেষ অতিথি হিসেবে উপস্থিত ছিলেন সংস্কৃতিমন্ত্রী আসাদুজ্জামান নূর। সূত্র-সংবাদ (শেষ পৃ.,ক.৬), ইত্তেফাক (শেষ পৃ.,ক.১)।

=8=

সম্পাদকীয়

- ক. **ইত্তেফাক** : ডেমু ট্রেনের সময়সূচি অফিসযাত্রীদের কর্মস্থলের সাথে সামঞ্জস্যপূর্ণ নয় বলে ৬২ শতাংশ যাত্রীর এ অভিযোগ আমলে নিয়ে এ ট্রেনের সময়ানুবর্তিতা অনুসরণের জন্য কার্যকর পদক্ষেপ নেওয়ার সুপারিশ।
- খ. **সংবাদ, অবজারভার, ফিনানশিয়াল এক্সপ্রেস** : রাজধানী ঢাকা আর বন্দরনগরী চট্টগ্রামের বাসিন্দারা জলাবদ্ধতা, যানজট, বেহাল সড়ক ব্যবস্থার কারণে চরম দুর্ভোগের মধ্যে আছে উল্লেখ করে জরুরি ভিত্তিতে এসব সমস্যা থেকে উত্তরণে যথাযথ পদক্ষেপ নেওয়ার ওপর গুরুত্বারোপ।
- গ. **জনকণ্ঠ** : সর্বোচ্চ আদালতে চূড়ান্ত রায়ের পর রাজধানীর হাজারীবাগ থেকে চামড়া শিল্পকে সাভারে নেওয়া হলেও সেখানে ১৫৪ টি শিল্প কারখানার মধ্যে মাত্র ৬২টি চামড়া উৎপাদনের কাজ শুরু করায় সেখানে মূলত কাজের উপযোগী পরিবেশ গড়ে ওঠেনি উল্লেখ করে সাভারে চামড়া শিল্পনগরী পুরোপুরি চালু করার সুপারিশ।
- ঘ. **যুগান্তর** : ম্যাক্সিম সমবায় সমিতি নামের একটি প্রতিষ্ঠানের প্রতারণার মাধ্যমে গ্রাহকের আমানতের প্রায় ৩০৩ কোটি টাকা হাতিয়ে নেওয়ার ঘটনায় উদ্বেগ প্রকাশ করে সমবায় সমিতির নামে মানুষকে প্রতারণিত ও নিঃশ্ব করার দুষ্চক্র থেকে সাধারণ মানুষকে মুক্তি দিতে কঠোর পদক্ষেপ কামনা।
- ঙ. **ইন্ডিপেনডেন্ট** : কাতার সংকটের কারণে গত জুনে কাতারে জনশক্তি রপ্তানি প্রায় অর্ধেক নেমে আসার বিষয় বিবেচনায় নিয়ে সিঙ্গাপুর ও মালয়েশিয়ার মতো দেশে যেখানে বাংলাদেশি শ্রমিকদের চাহিদা আছে সংশ্লিষ্ট মন্ত্রণালয়কে সেসব দেশে আরও শ্রমশক্তি পাঠানোর ব্যবস্থা করার আহ্বান।
- চ. **ডেইলি সান, নিউজ টুডে, নিউ এজ, যায়যায়দিন, সমকাল, যুগান্তর** : ২০১২ সাল দিনাজপুরে লিচু খেয়ে এনডোসালফান বিষক্রিয়া ১৩ শিশুর মৃত্যুর হওয়ার রিপোর্টের বিষয় তুলে ধরে এনডোসালফান এর ব্যবহার নিষিদ্ধ থাকায় করাসহ খাদ্যদ্রব্যে বিষাক্ত কেমিকেল, ফরমালিন ও কীটনাশকের ব্যবহার বন্ধে কঠোর পদক্ষেপ নেওয়ার সুপারিশ।
- ছ. **ডেইলি স্টার, নিউ নেশন, ইত্তেফাক** : সাত বছর আগে পাবলিক বিশ্ববিদ্যালয়ে একক ভর্তি পরীক্ষা নেওয়ার সিদ্ধান্ত এখনও বাস্তবায়িত না হওয়ায় অভিভাবক ও শিক্ষার্থীদের দুর্ভোগ বিবেচনায় নিয়ে দ্রুত এ ব্যাপারে সুচিন্তিত সিদ্ধান্ত নেওয়ার আহ্বান।
- জ. **নিউ এজ** : যশোরের ভবদহের জলাবদ্ধতার দুর্ভোগের হাত থেকে অভয়নগর, মনিরামপুর ও কেশবপুরের জনগণকে রক্ষা করতে এ সমস্যার স্থায়ী সমাধানে প্রত্যাশা।

উপ-সম্পাদকীয়

যায়যায়দিন পত্রিকায় প্রকাশিত কলামে উল্লেখ করা হয়েছে, দেশের মানুষের আর্থ-সামাজিক উন্নয়নে কাজ করা রাজনীতির প্রধান উদ্দেশ্য হওয়া উচিত।

নিবন্ধ ও ফিচার

ভোরের কাগজ পত্রিকায় প্রকাশিত 'পরীক্ষার খাতা মূল্যায়ন' নিবন্ধে অভিমত প্রকাশ করা হয়েছে, শিক্ষার মান

নিশ্চিত করতে হলে শিক্ষকদের মান নিশ্চিত করতে হবে ।

#

ফাহিমা/শুকলা/মরজিনা/সাইদা/রশীদ/তানিয়া/২০১৭/৯.০০ ঘণ্টা